



**Cussegli da vischraunca 2017/2020**  
**Protocol no. 10**  
Seduta dils 23 da fevrer 2018

---

## Protocol

**dalla seduta dil cussegli da vischraunca,  
venderdis, ils 23 da fevrer 2018 allas 20.15 –22.45  
Liug: Casa comunala**

---

**Presidi:** Armin Manetsch

**Actuar:** Paul Duff

**Presents:**

a) Cussegli	Christoph Berger Stefan Columberg Edgar Durschei Anna Maria Genelin Wendelin Jacomet Helga Probst-Linder	Armin Berther Adrian Deflorin Mario Flepp Rita Huonder-Tenner Christian Loretz Livio Zanetti
b) Suprastanza	Robert Cajacob Victor Flepp Iso Mazzetta	Clemens Berther Jris Lombros
c) Perstgisas: Cussegli	Admir Jasarevic	Giusep Lozza
d) Hospes	1	

## **Plaid d'avertura entras il president**

Cun bia neiv, vent ed era plievgia ha igl onn 2018 entschiet empau turbulent. Differentas vias ein stadas serradas duront plirs dis. Persuenter vein ussa grondiusas cundiziuns da neiv per il sport d'unviern.

### *CSC ed Acla da Fontauna*

Ina fetg interessanta presentaziun dils dus projects vein astgau tedlar ils 12 da schaner sin claustra. Era sch'ei maunca aunc ina ni l'autra purschida per famiglias ei quei in fetg bein gartegiau project. Lein sperar ch'ins sappi realisar fetg bia da quei.

### *Sedrun Mustér Turissem*

SMT ha eligiu ina nova suprastonza. Suenter bia critica e discussiun da nos 1000 experts da turissem che san adina tut meglier, lein ussa sperar ch'ei vegni in tec pli ruasseivel per ils da SMT. Als partents suprastonts bien engraziament per lur buna lavur e fermas gnarvas, ed als novs suprastonts cordiala gratulaziun ed in bien maun per tuttas sfidas. Ina caussa positiva ha la suprastonza nova ussa schon. Ella ei quella che aulza SMT ord ils schliats onns cun paucas pernottaziuns. Buca perquei ch'ella ha forsa la sligiazun per la digren da pernottaziuns, na las pernottaziuns vegnan a crescher en tuttacass cugl augment da letgs ella regiun. Aschia sa ella far tgei ch'ella vul ed ella ei la megliera suprastonza dapi biars onns.

### *Pumpiers Sursassiala*

Oz decidin in credit per la cumpra d'in auto-cistiarna. Quei ei buca ina investiziun pils pumpiers sco entgins manegian, na quei ei ina investiziun ella segirtad da nus e nos hospes. Era ils Pumpiers Sursassiala ston investar en tecnica moderna e pli efficienta. Sch'ins mira il svilup en nossa vischnaunca ston era els esser semtgai per igl avegnir. Era il traffic ei buca d'emblidar, che vegn adina pli gronds e sperts, era leu ston ils pumpiers saver agir spert. Igl auto-cistiarna vegl duvrava uss numnadamein plitost cazzola melna e buca blaua, damai ch'el era plitost in impediment sin via enstagl in auto d'agid spert.

### *Cabina Salins- Cuolm da Vi*

Il cussegl da vischnaunca Tujetsch ha a caschun da sia davosa seduta concediu unanimamein il credit per ina cabina sil Cuolm da Vi sco era ils dretgs ch'ei drova per astgar traversar quei territori. Uss sto mo aunc il pievel a caschun dalla radunanza communalha conceder il medem. Lein sperar che la tenuta fetg positiva dil cussegl porti era fretgs tier ils Tujatschins.

## Communicaziuns

### Mortoris:

Rosmarie Lozza-Laim, naschida igl 1. da zercladur 1950, morta ils 18 da december 2017  
Carli Bisquolm, naschius ils 2 da schaner 1945, morts ils 22 da december 2017  
Barla Tönz-Albin, naschida ils 7 da schaner 1930, morta ils 2 da schaner 2018  
Pius Columberg-Gadola, naschius igl 1. da zercladur 1933, morts ils 15 da schaner 2018  
Mathilda Lutz, naschida ils 14 da mars 1928, morta ils 16 da schaner 2018  
Baselia Venzin, naschida ils 22 da matg 1923, morta ils 8 da fevrer 2018  
Carlina Morger-Flepp, naschida ils 25 da matg 1925, morta ils 20 da fevrer 2018

### Naschientschas:

Jason Henry Flury, 26 da schaner 2018 fegl da Lesley e Placi Flury -Züst  
Amelin Nima Muscas, 31 da schaner 2018, feglia da Sonja e Sandro Muscas-Schmed  
Andrin Nelian Aurel Loretz, 5 da fevrer 2018, fegl da Clarissa e Christian Loretz-Duff

**Tractandas:**

1. Protocol 9-2017/2020
2. Lescha davart l'indemnisaziun dallas prestaziuns dalla vischnaunca Disentis/Mustér en connex cul provediment d'electricitad: Approbaziun (messadi nr. 14-2017/2020)
3. Pumpiers Sursassiala: Credit per auto-cistiarna (messadi nr. 15-2017/2020)
4. Postulat davart scaffir novas plazzas el subcenter Disentis/Mustér: Rapport (postulat P2-2013/2016)
5. Postulat davart instradar ina discussiun sur dallas structuras politicas per esser semtgaus sin las proximas elecziuns da 2020: Rapport (postulat P3-2013/2016)
6. Postulat davart realisar in project d'ina rundella ed in sutpassadi per procurar la segirtad dil traffic d'autos, pedunzs e velocipedists ad Acla da Fontauna (postulat P1-2017/2020)
7. Uras da damondas (conform ad art. 44 dil regulativ da fatschentas)

Cussegli da vischnaunca Disentis/Mustér  
Il president: Igl actuar:

Armin Manetsch

Paul Duff



## 1. Protocol

Protocol nr. 9-2017/2020

Il protocol ei vegnius tarmess tier per posiziun. Enteifer ils tschun dis fixai ei vegniu inoltrau neginas objecziuns.

Il protocol vegn **approbaus senza midadas.**

Cussegli da vischraunca Disentis/Mustér  
Il president: Igl actuar:

Armin Manetsch

Paul Duff



Cussegl da vischraunca 2017/2020

Protocol no. 10

Seduta dils 23 da fevrer 2018

---

## 2. Lescha davart l'indemnisaziun dallas prestaziuns dalla vischraunca Disentis/Mustér en connex cul provediment d'electricitat: Approbaziun (messadi 14-2017/2020)

### Presentaziun:

#### Suprastonza:

President Robert Cajacob sebasa sil messadi 14-2017/2020 il qual cuntegn l'obligaziun dalla vischraunca da crear la baza legala per incassar la taxa da present 1 rap per 1 kilowat ura diever d'electricitat. La taxa vegg dada a quen dalla Repower cul quen d'electricitat dils consumenti.

### Discussiun:

#### Cussegl:

Dapresent ei la taxa fixada sin 1 rap per kilowat ura. Patratg'ins da far in augment egl avegnir?

Cusseglier Wendelin Jacomet fa la proposta da suttametter il conclus conform art. 21 dalla constituziun communal al referendum facultativ.

#### Suprastonza:

Las vischrauncas ein autonomas da fixar la taxa. In alzament ei dapresent a Mustér buca tema. La decisiun dil cussegl vegg suttamessa al referendum facultativ.

#### Cussegl:

Tgei cuosts cuviera quella taxa, dat ei in motiv d'alzar quella? San ins fixar quei 1 rap per kilowat ura ella lescha?

#### Suprastonza:

La taxa fa ora rodund frs. 160'000.-- ad onn. Quels daners van sut entradas el quen da vischraunca. Igl ei ina taxa sco obolus per traversar il territori dalla vischraunca cun las lingias. Il prezi ei stipulaus en ina cunvegnentscha.

#### Cussegl:

Pertgei ei stipulau egl artechel sut 2.2. che la suprastonza fixescha la taxa? El reglement da taxas ei la fixaziun da taxas caussa dil cussegl ed ei füss da setener vid la constituziun. Cusseglier Edgar Durschei propona da midar la cumpetenza da fixar quella taxa ed adossar quella al cussegl da vischraunca.

#### Suprastonza:

La proposta ei surprida tenor la cunvegnentscha e tenor igl usus practicaus tochen ussa tier nus ed en auters loghens. La taxa vul ins era coordinar cun las outras vischrauncas. Per far quei ei la cumpetenza tier la suprastonza pli sempla. Ina midada semeglionta stuess ins era far tier las outras vischrauncas.

#### Cussegl:

Mintga vischraunca ei autonoma da fixar la taxa.

Sch'ins vul buca suandar la constituziun, sche duei la suprastonza silmeins informar il cussegl e far midadas el rom dil preventiv per igl onn veggent.

Suprastonza:

La lescha legalisescha ils fatgs existents. Las determinaziuns ein coordinadas cun la Repower, l'Energia Alpina e las sis vischnauncas. Fatgs da muntada pintga schaian ella cumpetenza dalla suprastonza. Midadas san ins decider e metter entuorn sempel e spert dalla suprastonza.

Cussegl:

Co ei lu in process da midar la taxa? Han tuttas vischnauncas la medema taxa?

Suprastonza:

Ella conferenza dils presidents da vischnaunca vegn fatg la proposta, la suprastonza decida silsuenter da midar la taxa.

Ina midada da cumpetenza havess per consequenza che la proposta sto vegnir messa avon il cussegl cun in messadi per schar decider. Ei sto buca esser che la taxa ei tuttina en tuttas vischnauncas. Nuslein denton coordinar quella culs vischins.

Cussegl:

Cusseglier Edgar Durschei retila sia proposta.

Cusseglier Wendelin Jacomet fa la proposta d'informar midadas dalla taxa el preventiv.

**Decisiun:**

*Il cussegl renviescha la proposta da Wendelin Jacomet che la suprastonza sto informar midadas dalla taxa el preventiv **cun 6 na, 4 gie, e 3 abstensiuns**.*

*Il cussegl approbescha la lescha davart l'indemnisaziun dallas prestaziuns dalla vischnaunca Disentis/Mustér en connex cul provediment d'electricitatad **senza cuntervuschs ed abstensiuns**.*

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff



### 3. Pumpiers Sursassiala: Credit per auto-cistiarna (messadi 15-2017/2020)

#### Presentaziun:

##### Suprastonza:

Gerau Victor Flepp fa attents sin las indicaziuns el messadi. Igl auto existent ha già 34 onns e drova mintg'onn reparaturas, igl onn vargau ei vegniu dau ora frs. 15'000.-- persuenter. La segirada da baghetgs animescha da cumprar il vehichel niev. Dil cantun savein nus spitgar ina participaziun da 27,5% dils cuosts dalla cumpria. Igl ei ina investiziun ella segirtad dils vischins e hospes. Igl auto ei equipaus a moda efficienta per ils basegns da nossa situaziun. Las vischnauncas Tujetsch e Medel han decidiu il credit da cumpria.

#### Discussiun:

##### Cussegli:

La schanza da reparter ils cuosts cun ina nova clav ei buca vegnida tschaffada per quell'occasiun. Mustér ha buca dapli profit da cumprar infrastructura per ils pumpiers. Talas investiziuns han da far nuot cul diember da habitonts. Sch'ins ei en retard cun la decisiun dalla cumpria, vegn ei munchentau da prender enta maun midadas arisguard il reglament e la structura da cuosts.

Ord tal motiv fa cusseglier Edgar Durschei la proposta da dar anavos la fatschenta e dar l'incarica alla suprastonza da reglar da niev la partiziun dils cuosts.

Il meini precedent ei endretg. L'investiziun pertucca denton la segirtad, perquei eis ei necessari d'entrar e decider la damonda dil credit.

Gie, la partiziun dils cuosts ei buca gesta. Igl ei da far vinavon cun reveder il regulativ. Per exemplu fuss ei da prender en e risguardar la surfatscha d'uaul. Cheu stuein nus far pressiun sin la suprastonza da reagir.

##### Suprastonza:

##### Gerau Victor Flepp:

La clav dat mintg'onn da discussiunar. Quella ei stipulada ellas statutas da 2008. Cun las investiziuns els hotels novs vegn Mustér egl avegnir engreviaus aunc dapli. Quei ei ina raschun da mantener la clav actuala. Plinavon vegnan las cunvegnes cul cantun per la participaziun alla cumpria digl auto-cistiarna buca meglieras. Perquei duess ins buca far dependent la cumpria dalla midada dil reglament dalla repartiziun dils cuosts.

President communal Robert Cajacob: Igl ei buca opportun da discutar dapresent cun la suprastonza da Medel. En cuort vegn ina nova eligida e la discussiun stuein nus far cun quella che vegn. Plinavon ha era il cantun da dir in plaid ella caussa dil reglament.

Gerau Victor Flepp: Nus savein che la damonda da credit ei s'entardada. Vus savesses far duas propostas. Ina gada dar l'incarica alla suprastonza da reglar da niev ils statuts dalla Corporaziun da Pumpiers Sursassiala. Sco secunda da conceder il credit per la cumpria digl auto-cistiarna.

Cussegli:

La cunvegna ha era sminuui ils cuosts dils pumpiers e Mustér ha spargnau expensas. El cantun dat ei pliras semegliontas situaziuns nua che pintgas beinstontas vischnauncas pagan pauc e las grondas meins fermas da finanzas ston surprender il bia. Ei fuss da far in sochel per exempl 30% dils cuosts da menaschi e dallas investiziuns ein da reparter uliv ed ils ulteriurs cuosts tenor la clav existenta. Nus stuein denton tractar la fatschenta e cumprar il vehichel necessari.

Las ponderaziuns dils concussegliers constattan. Ei dat aunc outras caussas ch'ein en disfavur per la vischnaunca da Mustér. Il svilup positiv en nossa vischnaunca engreviescha nus pli fetg ch'autras, las qualas duessen era s'engaschar dapli.

En vesta dalla problematica discurrida entras la discussiun, retila cusseglier Edgar Durschei sia proposta da renviar la fatschenta. Sco giavischau dalla suprastanza fa el la secunda proposta: Incaricar la suprastanza communalala d'instradar la revisiun dils statuts dils Pumpiers Sursassiala, cunzun era la repartiziun dils cuosts.

Debatta da deliberaziun: El messadi dil cussegli da vischnaunca da Tujetsch ein autras cefras publicadas ch'el messadi dil cussegli da Mustér. Tgei indicaziuns constattan?

Suprastanza:

Gerau Victor Flepp:

Quei sa esser che las cefras dalla vischnaunca da Tujetsch ein indicadas tenor la versiun dalla repartiziun provisoria. Nossas indicaziuns ein tenor la versiun definitiva e constattan.

**Decisiun:**

*Il cussegli decida:*

1. *Da conceder in credit da frs. 177'000.-- per la cumpra d'in auto-cistiarna per il corp da Pumpiers Sursassiala **senza cuntervuschs ed abstensiuns**.*
2. *D'incaricar la suprastanza communalala d'instradar ina revisiun dils statuts dils Pumpiers Sursassiala, cunzun era la repartiziun dils cuosts **senza cuntervuschs ed abstensiuns**.*

Cussegli da vischnaunca Disentis/Mustér  
Il president: Igl actuar:

Armin Manetsch

Paul Duff



Cussegli da vischraunca 2017/2020

Protocol no. 10

Seduta dils 23 da fevrer 2018

---

#### 4. Postulat davart scaffir novas plazzas el subcenter Disentis/Mustér: Rapport (postulat P2-2013/2016)

Suprastanza:

President communal Robert Cajacob pren posiziun tiel postulat e puntuescha che la discussiun da crear plazzas en vischraunca seigi savens cuntegn da discussiuns en differents gremis. Tier novas plazzas dalla Regiun Surselva decida igl eligiu nua ch'el pren domicil. L'elecziun dependa cheu dalla qualificaziun dil candidat dalla candidata.

Novas plazzas dat ei en connex cun las surbaghegiadas Acla da Fontauna nua ch'igl ei previu 100 plazzas e Catrina Resort che preveda 40 plazzas. Nua che quellas persunas habiteschan san ins buc ordavon. Tier plazzas dil cantun eis ei buca pusseivel alla suprastanza dad intervegnir. Novas e mantener plazzas a Mustér ei buca sulet l'incarica dalla suprastanza. La UCP organisescha l'ex18 e promova l'attracziun ed animaziun dallas fatschentas d'investar per ch'il hanletg e la cumpra dils consumenti restien el vitg.

#### ***Discussiun:***

Cussegli:

Cussegliera Rita Huonder-Tenner che ha inoltrau il postulat engrazia alla suprastanza per sia lavur. Egl avegnir ein ils centers a Cuera attractivs. Ston ins veramein schar ir naven las plazzas dil cantun? Fan autras vischrauncas era discussiun da tala problematica? Ei vala da tener aviert ils egls ed esser attents, il cussegli grond havess la pusseivladad da far opposiziun.

Suprastanza:

Gerau Clemens Berther sco suppleant dil cussegli grond puntuescha l'imporzonza dallas colligiaziuns. Plirs luvrers van alla lavur anoragi. Quei ei era in trend e perquei stuein nus esser attractivs per habitar e cunzun haver bunas colligiaziuns. El cussegli grond battan tuts cussegliers per la caussa.

President communal Robert Cajacob revegn alla problematica dalla decisioen da secundas habitaziuns nua ch'il pievel indigen havess saviu batter dapli ed impedir il resultat. Il pievel sto realisar ch'el sto luvrar per mantener nossa regiun. Nus havein ussa la schanza da mantener 200 plazzas ella regiun cun dir na all'iniziativa No-Billag.

President Robert Cajacob: A Glion vegn la staziun baghegiada da niev e Glion survegn il tact da mes'ura. Tenor il directur Renato Fasciati dalla Viafier retica vegni teniu en egl il basegns e diever dil tren tochen Mustér.

Cussegli:

Ei va en quella tematica buc da stuschar giu la responsabladad sil privat e sin l'economia.

Suprastanza:

President Robert Cajacob precisescha la posiziun dalla suprastanza che pren quella caussa seriusa e fa bia lavur. Mintga suprastont lavura dapli che siu pensum da lavur pretenda ed era il canzlist communal fa il medem.

Bunamein en mintga seduta ni caschun d'informaziun nua ch'il president communal ei presents ei il manteniment da plazzas en vischnaunca e regiun in tema. El spetga dapli fidonza ella laver dalla suprastanza en quei grau.

Cussegli da vischnaunca Disentis/Mustér  
Il president: Igl actuar:

Armin Manetsch

Paul Duff



**5. Postulat davart instradar ina discussiun sur dallas structuras politicas per esser semtgaus sin las proximas elecziuns da 2020:  
Rapport (postulat P3-2013/2016)**

President communal Robert Cajacob:

Igl onn 2008 ha ina cumissiun fatg ina consultaziun al pievel. Quel ha affirmau cun sur 61% da star tiel parlament. La suprastanza anfla il parlament sco meglier instrument da far politica communal. Quei semuossa era oz en la viva discussiun. Ils cussegliers ein multiplicaturs dil mein politic. Plinavon ei era il cussegliader da vischrauncas dil cantun s'exprimius plitost en favur d'in ferm cussegli da vischraunca che per ina radunanza communal. Impurtont ei che glieud giuvna separticipeschi en cumissiuns ed en auters gremis dalla veta publica.

***Discussiun:***

Cussegli:

Cusseglier Edgar Durschei autur dil postulat ei dil mein ch'ei mondi ad el buca per dismetter il parlament. Ei fagess basegns da far discussiun co svegliar igl interess politic pil cussegli. Tgei pusseivladads dat ei da far quei?

Cussegli da vischraunca Disentis/Mustér  
Il president: Igl actuar:

Armin Manetsch

Paul Duff



Cussegli da vischnaunca 2017/2020

Protocol no. 10

Seduta dils 23 da fevrer 2018

---

## 6. Postulat davart realisar in project d'ina rundella ed in sutpassadi per procurar la segirtad dil traffic d'autos, pedunzs e velocipedists ad Acla da Fontauna (postulat P1-2017/2020)

### Presentaziun:

Cussegli:

Cusseglier Wendelin Jacomet sco postulant menziunescha las grondas investiziuns egl areal Acla da Fontauna e Sontga Catrina. Quellas procuran bein per svilup turistic e novas plazzas. Ei vegn a dar in augment da traffic e da pedunzs. La vischnaunca ed il cantun ein responsabels da prender mesiras da garantir la segirtad. Ina rundella pertass migliur per la circulaziun e la segirtad. Il bus local survegness dus plazs da fermada. La staziun da viafier Acla vegn a survegnir dapli impurtonza ed activitat. Leu sto la via vegnir meglierada en caussa segirtad. Ils dus exempels da Laax e da Pontresina ein vegni fatgs cun rundellas en collaboraziun cul cantun il qual ha surpriu 50% dils cuosts. Baul ni tard vegn la vischnaunca confruntada cun cuosts. La rundella porta segirtad senza tempo 30 e senza untgida dil vitg che pertass disavantatgs.

Suprastonza:

Gerau Iso Mazzetta dilucidescha la situaziun cun skizzas dalla situaziun el liug. A Pontresina settracta ei dil sviament dil vitg en via cantunala ed ei buca da cumpareglier cun nossa situaziun. Cheu settracta ei d'ina via principala e vias laterales. Il cantun vesa buca la necessitat d'ina rundella. Quella drova plaza ed ei tuccass da slargiar la punt. La rundella descarga buca il traffic. La sligiazun sto vegnir anflada culs investurs dil Hotel Acla e Catrina Resort e pendicularas. Igl access dil Hotel Acla vegn da niev concepius auter che dapresent. En quei connex dat ei la pusseivladad da sligiar la situaziun per pedunzs. Il sutpassadi ei buca attractivs ed era ils pertuccai ein encunter in tal sco era encunter ina rundella che vegn buca en in liug ideal. La situaziun ei da sligiar en in concept entir cun dar prioritat a pedunzs, lu al traffic dil bus e suenter al traffic da transit. In sviament sligliass la problematica mo drova l'execuziun 25 onns. Ussa drova ei segir in'insla da reducir la spertedad. Meglierar segirtad senza zona 30 ei ina gronda sfida.

### Discussiun:

Cussegli:

Cusseglier Wendelin Jacomet engrazia per la lavur gia fatga en connex cul postulat. Signur Weber dil Catrina Resort ha menziunau ch'el vegni a luvrar ensemble culs ustiers dil vitg. Ord quei motiv sto il cuors dil bus vegnir meglieraus. Igl incasso per il diever ei in'opzioni. Il sutpassadi fagess in survetsch da segirtad. In sviament dil vitg cuosta era e las fatschentas piardan clients cun quel.

La lavur en connex cul postulat ei fatga per 90%. Ussa vai per surdar quel alla suprastonza.

Gerau Iso Mazzetta ha mussau differentas variantas. Ei vala da metter la peisa sin la segirtad, quei ch'ei il cuntegn dil postulat.

La suprastonza senta ord la discussiun la problematica dalla situaziun. Igl ei buca da setener vid la rundella, ils ulteriurs puncts dil postulat ein d'impurtonza.

**Decisiun:**

*Il cussegl decida da surdar il postulat da cusseglier Wendelin Jacomet alla suprastonza communal per procurar la segirtad dil traffic d'autos, pedunzs e velocipedists ad Acla da Fontauna **senza cuntervuschs ed abstensiuns.***

Cussegl da vischnaunca Disentis/Mustér  
Il president: Igl actuar:

Armin Manetsch

Paul Duff



## 7. Uras da damondas (conform ad art. 44 dil regulativ da fatschentas)

Cussegli:

Avon in temps ei vegniu fatg la damonda tgei che succedi cun la zona d'industria a Plaun da Diras. Co vesa la situaziun ora dapresent?

La suprastanza duess incaricar il cussegli cun cumissiuns da lavur. Aschia savess ins trer vitier glieud giuvna per animar quella pil process politic egl avegnir.

L'illuminaziun publica ei midada sin LED. Quei ei iu bunamein senza ch'ins hagi percurschiu. Dat ei gia resultats dil respargn?

Suprastanza:

La risposta dil cantun en caussa zona d'industria Plaun da Diras ei vegnida ils 14 da fevrer 2018. La zona sa vegnir midada quei che ha per consequenza che la lescha da baghegiar vegn midada ed ei succeda ina votaziun dil pievel prevedentamein il zercladur 2018.

Sch'ei dat la caschun per far cumissiuns da lavur fagein nus quei bugen.

L'illuminaziun LED ei gest installada. Resultats dil respargn ein aunc buca avon maun.

Cussegli da vischraunca Disentis/Mustér  
Il president: Igl actuar:

Armin Manetsch

Paul Duff



Cussegli da vischraunca 2017/2020

Protocol no. 10

Seduta dils 23 da fevrer 2018

---

## Orientaziuns:

Suprastanza:

Gerau Clemens Berther orientescha: La suprastanza communal Mustér ha eligiu ils 5 da fevrer 2018 las suandontas persunas ella cummissiun per reveder la lescha d'agricultura:

Armin Manetsch, president uniu purila, president cussegli da vischraunca

Wendelin Jacomet, cusseglier da vischraunca

Ervin Maissen, uffeci da baghegiar, cau infrastructura communal

Simon Cathomen, uffeci forestal

Thomas Durschei, uffeci da catscha e pesca

Marco Schmed, pendicularas

Ursina Murer-Fatzer, actuara

Clemens Berther, departament d'agricultura

Naven dils 15 da fevrer 2018 ha il bostger Simon Cathomen siu biro forestal a Cuoz sur il luvratori communal. Ervin Maissen, cau infrastructura communal, vegn a retrer da niev il biro da Simon Cathomen en casa communal.

Cussegli da vischraunca Disentis/Mustér  
Il president: Igl actuar:

Armin Manetsch

Paul Duff

Disentis/Mustér, ils 26 da fevrer 2018